

阿毗達磨大毗婆沙論卷第二十一 神一

五百大阿羅漢等造

唐三藏法師玄奘奉詔譯

雜蘊第一中智納息第二之十三

能作因體即增上緣俱一切法爲自性故然
義有異謂多勝義是增上緣義不障礙義是
能作因義問若多勝義是增上緣義則所緣
緣亦應名增上彼體亦攝一切法故如品類
足論辯此二緣俱以一切法爲自性故答若
依相續則此二緣寬狹相似若依刹那則增
上緣體義多勝謂緣一切法非我行相現在
前時一切法中非所緣者謂此自性相應俱
有非增上者唯此自性由此相應俱有諸法
是此增上非所緣故問若不障礙義是能作
因義者則能作因體應不攝一切法謂一有

情若有一趣蘊界處起即此有情更無第二
蘊界處生若依一眼一眼識生於中更無第
二識起如於一處若有一樹無第二樹若有
一舍無第二舍如是諸法互相障礙云何此
因攝一切法答雖有此事而理無違謂一有
情若有一趣蘊界處起義語諸餘蘊界處曰
我於汝等不爲障礙隨汝等生設我與汝爲
障礙者汝等於彼則不得生若依一眼眼識
現前此識義語餘眼識言我於汝等不爲障
礙隨汝等生設我與汝爲障礙者汝等於彼
不得現前樹及舍喻准此應說又即於彼爲
障礙者彼若生時亦不爲礙是故一法將欲
生時餘一切法皆不爲礙設有一法障礙彼
者彼法爾時應不得起故不障礙義是能作
因義而能作因攝一切法

問因緣和合故諸法生因緣和合故諸法滅
因緣無有不和合時諸法云何不恒生滅尊
者世友作如是言一生和合故諸法生一滅
和合故諸法滅生滅和合無二無多諸法云
何恒生恒滅復作是言因緣和合諸法生已
次後相續無量刹那連注覆壓不能復起如
人墮崖復為上土續續覆壓彼人爾時尚不
能動況得起耶大德說曰和合因緣既唯暫
有云何諸法恒生滅耶尊者覺天作如是說
諸法生滅各唯一時應有作用生已復生滅
已復滅便為無用是故諸法生滅非恒問因
緣和合生諸法時因緣功能為多為一若言
唯一云何依多若言有多云何和合答可說
為一可說為多辨一事故依多體故復次因
緣功能相隨順故可說為一生多法故可說

為多復次因緣功能同令諸法起作用故可
說為一起色受等作用別故可說為多若彼
功能無多種者所起作用色非色等應無差
別是故諸法因緣功能不可定言是多是一
問如是因緣故諸法得生亦有因緣故諸法
滅耶譬喻尊者作如是說生待因緣滅則不
爾如人射時發箭須力墮則不然如陶家輪
轉時須力止則不爾阿毗達磨諸論師言諸
法生滅俱待因緣以滅與生皆是用故問前
所說喻當云何通答不必須通非三藏故然
凡聖法異不可例同又箭與輪亦由因墮止
箭墮者謂排楯的等設無餘因則彎弓等
亦是其因若不先射今何由墮輪止因者謂
手杖等設無餘因則能轉者亦是其因若先
不轉今何由止問若排手等障礙箭輪令其

隨止如何與彼爲能作因答排手等物障彼
行轉非礙墮止爲能作因於理何失問若法
生滅俱待因緣生滅因緣一切時有何不生
時亦滅滅時亦生耶尊者世友作如是說生
滅兩時和合各異是故生時無滅滅時無生
不可一因有二果故復作是說生時因緣隨
順彼法滅時因緣違害彼法雖彼因緣前後
體一而損益用時分不同猶如苾芻解安居
已携持衣鉢遊歷諸寺有賊見之先申禮敬
恭順隨逐後至曠野奪其衣鉢凌辱而去生
滅因緣亦復如是大德說曰生滅兩事既互
相違如何俱有尊者妙音作如是說諸法生
時未有作用當何所滅諸法滅時已有作用
復何所生問一法既與多法爲能作因多法
亦與一法爲能作因一法與多法爲能作因

時爲如一法與多法爲因爲如多法與多法
爲因耶多法與一法爲能作因時爲如多法
與一法爲因爲如一法與一法爲因耶設爾
何失此一法與多法爲能作因時若如一法
與多法爲因者云何不因一故果亦成一若
如多法與多法爲因者云何不果多故因亦
成多此多法與一法爲能作因時若如多法
與一法爲因者云何不因多故果亦成多若
如一法與一法爲因者云何不果一故因亦
成一答應作是說一法與多法爲能作因時
亦如多法與一法爲因多法與一法爲能作
因時亦如一法與多法爲因問若爾一應成
多多應成一答我說一亦成多多亦成一此
依作用不依實體我說諸因以作用爲果非
以實體爲果又說諸果以作用爲因非以實

體爲因諸法實體恒無轉變非因果故然無
爲法名能作因但不爲障非能辦果復次有
爲法與有爲法爲能作因亦以彼爲增上果
有爲法不與無爲法爲能作因亦不以彼爲
增上果無爲法不與無爲法爲能作因亦不
以彼爲增上果無爲法與有爲法雖爲能作
因而不以彼爲增上果以無取果與果用故
問何故有爲法有因有果無爲法無因無果
耶答有爲法流轉世故有因有果無爲不爾
故無因果如遠行者須具資糧能有所至非
不行者復次有爲法有作用故有因有果無
爲不爾故無因果如營務者須備作具能有
所成非不營者復次有爲法有生滅故有因
有果無爲不爾故無因果復次有爲法有和
合故有因有果無爲不爾故無因果復次有

爲法有三相故有因有果無爲不爾故無因
果復次有爲法性羸劣故有因有作用故有
果如羸劣者依他而住非勇健者無爲不爾
故無因果復次有爲法如王如王眷屬如富
貴者如富貴者眷屬如因陀羅如因陀羅眷
屬故有因有果無爲不爾故無因果問有爲
法不生者爲有爲法爲留難故令彼不起爲
無爲法爲留難故彼不生耶答以有爲法爲
留難故令彼不起非無爲法無爲與彼爲能
作因於一切時不障礙故如注水瀆水若不
流自爲餘因非瀆爲障問無爲法與有爲法
爲能作因及增上緣時何者爲勝爲緣彼者
爲餘法耶答等無差別如兩豆聚若無爲法
與有爲法爲所緣緣有是有非復次過去法
與過去法爲能作因亦以彼爲增上果過去

法與未來現在法爲能作因亦以彼爲增上
果義言我若不與汝爲近能作因者汝則無
因然有爲法無無因者未來法與未來法爲
能作因亦以彼爲增上果未來法與過去現
在法爲能作因然不以彼爲增上果所以者
何果與因俱或在後故義言我若不與汝爲
近能作因者汝則無果然有爲法無無果者
現在法與現在法爲能作因亦以彼爲增上
果現在法與未來法爲能作因亦以彼爲增
上果義言我若不與汝爲近能作因者汝則
無因然有爲法無無因者現在法與過去法
爲能作因然不以彼爲增上果果與因俱或
在後故義言我若不與汝爲近能作因者汝
則無果然有爲法無無果者問何故後法與
前法爲能作因而前法非後法增上果耶答

不障礙義是能作因義後法於前法不障礙
故得爲能作因果必是因力所取與後法於
前無取與力故前法非後果如有爲法以無
爲法爲能作因而非彼果彼無取果與果力
故復次善法與善法爲能作因亦以彼爲增
上果善法與不善無記法爲能作因亦以彼
爲增上果不善法與不善法爲能作因亦以
彼爲增上果不善法與善無記法爲能作因
亦以彼爲增上果無記法與無記法爲能作
因亦以彼爲增上果無記法與善不善法爲
能作因亦以彼爲增上果如善不善無記法
展轉爲能作因及增上果如是三界繫不繫
法學無學非學非無學法見所斷修所斷不
斷法有色無色法有見無見法有對無對法
有漏無漏法相應不相應法等應知亦爾復

次有善法與善法爲近能作因如由善業生樂善家生已復能多修妙行有善法與不善法爲近能作因如由善業生富貴家生已放逸多造惡行有不善法與不善法爲近能作因如由不善業生不律儀家生已復造衆多惡行有不善法與善法爲近能作因如由不善業身遭病惱或失財位心生厭悔修諸妙行有內法與內法爲近能作因如一有情供多人衆有內法與外法爲近能作因如諸農夫種植稼穡有外法與外法爲近能作因如水糞等生長苗稼有外法與內法爲近能作因如飲食等長養有情有一趣法與五趣法爲近能作因如有多人食一羊肉身強盛已

有作善業有作惡業作善業者得生人天作惡業者墮三惡趣

問若一有情害生命時一切有情不障礙彼無不與彼爲能作因何不一切俱得殺罪答彼能殺者起殺加行亦令果滿故得殺罪餘不爾故不得殺罪復次彼起惡心亦斷他命故得殺罪餘不爾故不得殺罪餘業道等准此應知問諸外財物一切有情共業所起何故盜者唯於財主得罪非餘答財主於財攝受守護餘則不爾是故盜者唯於財主得罪非餘復次財主於財作已有想盜者於彼作財主想故唯於彼得罪非餘復次若財物於彼是士用果及增上果者於彼得罪財物於餘一切有情是增上果非士用果是故於彼不得盜罪問士用果與增上果有何差別答作功力得者是士用果不障礙得者是增上果復次財物於作者是士用果於用者是增

上果如諸果實於種植者是士用果亦增上
果於食用者唯增上果如諸財物於營求者
是士用果亦增上果於受用者唯增上果
問此器世界蘇迷盧山洲渚等物一切有情
共業所起於中若有般涅槃者何故此物不
減少耶尊者世友作如是說若物是彼士用
果及近增上果者亦有減少蘇迷盧等但是
彼遠增上果故無減少復作是說蘇迷盧等
一切有情共業所起假使此中一有情在由
彼業力所任持故亦不減少況有無量無邊
有情未得滅度如富貴者雖已命終而彼宮
殿園林象馬不隨隱沒是餘有情業力持故
此亦如是復作是說此中雖有無量有情得
般涅槃及生他處復有無量無邊有情來生
此界由彼業力故不減少尊者覺天作如是

說此是過去業力所持故無減少問如轉輪
王於四洲渚皆得自在是何果耶答自身威
勢是異熟果所統領物是增上果彼於過去
修習增上自身眾具諸善業故今得如是二
殊勝果復次有三種增上一自增上二世增
上三法增上自增上者如有一類煩惱未斷
惡境現前而為自護不起惡業勿我由斯墮
諸惡趣世增上者如有一類煩惱未斷惡境
現前護世間故不起惡業勿我由斯為世譏
毀有作是說勿由我故世間有情造諸惡業
法增上者如有一類煩惱未斷惡境現前為
護法故不起惡業勿由我故令諸世間輕毀
正法此三即是近能作因問何故此三說名
增上答以於善法不障礙故是善親近增上
緣故問能作因力有增減不答有如多人眾

挽大木時中有盡力不盡力者其盡力者能
作因增不盡力者能作因減如後挽木豎刹
牽船轉石等時應知亦爾如內於外若外於
內外內自望亦復如是問能作因與增上果
何者為多答能作因多增上果少以能作因
攝一切有為無為法增上果唯攝有為法故
由此故說頗有法於法非能作因耶答有謂
自性於自性頗有法於他性非能作因耶答
有謂有為於無為及無為於無為問能作因
以何為自性答一切法已說自性所以今當
說問何故名能作因能作是何義答不障礙
義是能作義有所辨義是能作義此能作因
定通三世及離世法有增上果如是已顯六
因自性今當復顯六因相雜不相雜義問若
法是相應因彼亦是俱有因耶答若法是相

應因彼亦是俱有因有法是俱有因彼非相
應因謂有為不相應法問若法是相應因彼
亦是同類因耶答應作四句有法是相應因
非同類因謂未來相應法有法是同類因非
相應因謂過去現在不相應法有法是相應
因亦同類因謂過去現在相應法有法非相
應因非同類因謂未來不相應法及無為法
問若法是相應因彼亦是徧行因耶答應作
四句有法是相應因非徧行因謂除過去現
在徧行隨眠及彼相應法諸餘相應法有法
是徧行因非相應因謂過去現在徧行隨眠
及彼相應法生住老無常有法是相應因亦
徧行因謂過去現在徧行隨眠及彼相應法
有法非相應因非徧行因謂除過去現在徧
行隨眠及彼相應法生老住無常諸餘不相

應法問若法是相應因彼亦是異熟因耶答
 應作四句有法是相應因非異熟因謂無記
 無漏相應法有法是異熟因非相應因謂不
 善善有漏不相應法有法是相應因亦異熟
 因謂不善善有漏相應法有法非相應因非
 異熟因謂無記無漏不相應法問若法是相
 應因彼亦是能作因耶答若法是相應因彼
 亦是能作因有法是能作因彼非相應因謂
 不相應法問若法是俱有因彼亦是同類因
 耶答若法是同類因彼亦是俱有因有法是
 俱有因彼非同類因謂未來法問若法是俱
 有因彼亦是徧行因耶答若法是徧行因彼
 亦是俱有因有法是俱有因彼非徧行因謂
 除過去現在徧行隨眠及彼相應俱有法諸
 餘有為法問若法是俱有因彼亦是異熟因

耶答若法是異熟因彼亦是俱有因有法是
 俱有因彼非異熟因謂無記無漏有為法問
 若法是俱有因彼亦是能作因耶答若法是
 俱有因彼亦是能作因有法是能作因彼非
 俱有因謂無為法問若法是同類因彼亦是
 徧行因耶答若法是徧行因彼亦是同類因
 有法是同類因彼非徧行因謂除過去現在
 徧行隨眠及彼相應俱有法諸餘過去現在
 法問若法是同類因彼亦是異熟因耶答應
 作四句有法是同類因非異熟因謂過去現
 在無記無漏法有法是異熟因非同類因謂
 未來不善善有漏法有法是同類因亦異熟
 因謂過去現在不善善有漏法有法非同類
 因非異熟因謂未來無記無漏法及無為法
 問若法是同類因彼亦是能作因耶答若法

是同類因彼亦是能作因有法是能作因彼非同類因謂未來法及無為法問若法是徧行因彼亦是異熟因耶答應作四句有法是徧行因非異熟因謂過去現在無記徧行隨眠及彼相應俱有法有法是異熟因非徧行因謂除過去現在不善徧行隨眠及彼相應俱有法諸餘不善善有漏法有法是徧行因亦異熟因謂過去現在不善徧行隨眠及彼相應俱有法有法非徧行因非異熟因謂除過去現在無記徧行隨眠及彼相應俱有法諸餘無記及無漏法問若法是徧行因彼亦是能作因耶答若法是徧行因彼亦是能作因有法是能作因彼非徧行因謂除過去現在徧行隨眠及彼相應俱有法諸餘一切法問若法是異熟因彼亦是能作因耶答若法

是異熟因彼亦是能作因有法是能作因彼非異熟因謂無記及無漏法十二問此六因幾是色幾非色答二唯非色謂相應徧行因餘通色非色如色非色有見無見有對無對有執受無執受是長養非長養是大種非大種是造色非造色亦爾問此六因幾有漏幾無漏答二唯有漏謂徧行異熟因餘通有漏無漏問此六因幾有為幾無為答五唯有為一通有為無為謂能作因問此六因幾過去幾未來幾現在答三通三世謂相應俱有異熟因二唯過去現在謂同類徧行因一通三世亦離世謂能作因問此六因幾善幾不善幾無記答一唯不善無記謂徧行因一唯善不善謂異熟因餘通三種問此六因幾欲界繫幾色界繫幾無色界繫答三唯

三界繫謂徧行異熟因餘通三界繫及不繫問此六因幾學幾無學幾非學非無學答三唯非學非無學謂徧行異熟因餘通三種問此六因幾見所斷幾修所斷幾不斷答一唯見所斷謂徧行因一唯見所斷修所斷謂異熟因餘通三種問此六因幾染汗幾不染汗答一唯染汗謂徧行因餘通二種如染汗不染汗有罪無罪黑白有覆無覆退非退亦爾問此六因幾有異熟幾無異熟答一有異熟謂異熟因餘通二種問此六因幾是異熟幾非異熟答二非異熟謂徧行異熟因餘通二種問此六因幾相應幾不相應答一唯相應謂相應因餘通二種如相應不相應有所依無所依有所緣無所緣有行相無行相有警覺無警覺有等無間無等無間亦爾問此六

因幾是四諦攝幾非四諦攝答二唯苦集諦攝謂徧行異熟因三唯苦集道諦攝謂相應俱有同類因一通四諦及非諦攝謂能作因問此六因幾是五蘊攝幾非五蘊攝答二唯四蘊攝除色蘊謂相應徧行因三通五蘊攝謂俱有同類異熟因一通五蘊及非蘊攝謂能作因問此六因幾何處攝答二唯意法處攝謂相應徧行因一唯色聲意法處攝謂異熟因三通十二處攝謂俱有同類能作因問此六因幾何界攝答一唯意法意識界攝謂徧行因一唯七心法界攝謂相應因一唯色聲七心法界攝謂異熟因三通十八界攝謂俱有同類能作因問如是六因誰有何果答相應俱有因有士用果同類徧行因有等流果異熟因有異熟果能作因有增上果其解

脫果是道所證非因所得問如是六因何時
取果何時與果答相應俱有因現在取果現
在與果一剎那取果一剎那與果取一剎那
果與一剎那果同類徧行因現在取果過去
現在與果一剎那取果多剎那與果取多剎
那果與多剎那果異熟因現在取果過去與
果一剎那取果多剎那與果取多剎那果與
多剎那果能作因有作是說現在取果過去
現在與果一剎那取果多剎那與果取多剎
那果與多剎那果有餘師說此能作因過去
現在取果過去現在與果多剎那取果多剎
那與果若取果時即能與果餘如前說若能
覺了如是六因即於四果分明照察如觀掌
中餘甘子等
復次諸法作用必假因緣因已廣辯次應說

緣緣有四種如施設論及見蘊辯然施設論
作如是說有法是因緣彼亦是等無間緣亦
是所緣緣亦是增上緣乃至有法是增上緣
彼亦是因緣亦是等無間緣亦是所緣緣問
一切法中有能作四緣者如心心所法有能
作三緣者如色心不相應行有能作二緣者
如無爲法何故彼說有法是因緣彼亦是等
無間緣乃至廣說耶答彼依容有故作是說
謂諸法中有心心所具四緣性不說一切皆
作四緣若盡理者應作是說問若法是因緣
彼亦是等無間緣耶答若法是等無間緣彼
亦是因緣有法是因緣彼非等無間緣謂除
過去現在非最後心心所法餘一切有爲法
問若法是因緣彼亦是所緣緣耶答若法是
因緣彼亦是所緣緣有法是因緣緣彼非因

緣謂無爲法問若法是因緣彼亦是增上緣
耶答若法是因緣彼亦是增上緣有法是增
上緣彼非因緣謂無爲法問若法是等無間
緣彼亦是所緣緣耶答若法是等無間緣彼
亦是所緣緣有法是因緣緣彼非等無間緣
謂除過去現在非最後心心所法餘一切法
問若法是等無間緣彼亦是增上緣耶答若
法是等無間緣彼亦是增上緣有法是增上
緣彼非等無間緣謂除過去現在非最後心
心所法餘一切法問若法是因緣緣彼亦是
增上緣耶答如是問若於一法具四緣者應
但一緣云何立四答依作用立不依物體一
物體中有四用故謂一刹那心心所法引起
次後刹那同類心心所法立爲因緣即此開
避次後刹那心心所法令得生故立爲等無

間緣即此能爲次後刹那心心所法所取境
故立爲所緣緣即此不障礙次後刹那心心
所法令得生故立爲增上緣此中因緣如種
子法等無間緣如開導法所緣緣如任杖法
增上緣如不障法如是等過去現在非最後
心心所法具四緣性餘有爲法有三緣性三
無爲法有二緣性皆依義說不依物體一物
體中有多義故如諸法中有能作六因者謂
過去現在不善徧行隨眠及彼相應法有能
作五因者謂過去現在無記徧行隨眠及彼
相應法或過去現在不善徧行隨眠及彼相
應法生老住無常或過去現在非徧行不善
善有漏心心所法有能作四因者謂過去現
在無記徧行隨眠及彼相應法生老住無常
或過去現在非徧行不善善有漏色心不相

應行或過去現在無漏心心所法或過去現在非徧行無記心心所法或未來不善善有漏心心所法有能作三因者謂過去現在非徧行無記色心不相應行或過去現在無漏色心不相應行或未來不善善有漏色心不相應行或未來無記無漏心心所法有能作二因者謂未來無記無漏色心不相應行有能作一因者謂無為法如一有為有多因義互不相違緣亦應爾問若爾因緣有何差別尊者世友作如是言無有差別因即是緣緣即是因如契經說二因二緣能生正見謂他言音及內如理作意又如大因緣經說佛告阿難老死支有如是由有如是因有如是集有如是生有如是緣謂生支是也故知因緣無有差別復作是說若有此則有彼此是彼

因亦是彼緣問由有瓶故得有瓶覺豈此瓶十一覺雖瓶為因答非但有瓶則有瓶覺以無瓶時亦有瓶覺雖有瓶時無瓶覺故然有和合故得有瓶覺是故和合是瓶覺因緣有作是說和合是因此和合因說名為緣問若一一別不名為因眾事和合亦應非因答如一一別不名和合眾事聚集即名和合故一一別不名為因眾事和合得名為因復有說者同類是因異類是緣如火於火麥於麥芽說名同類問麥於麥芽有何同類若同稱麥名同類者應田水等大種同故亦名同類則田水等應是麥因復有說者近者是因遠者是緣問若爾因與等無間緣應無差別又善心無間起不善或無記心應是因非緣復有說者不共是因共者是緣問若爾眼於眼識應是

因非緣以不共故又麥於芽灰應是緣非因以是共故復有說者能生者是因隨能生者是緣問若爾生支於老死應非緣隨順生支有等於老死應非因復有說者能長養自相續者是因能長養他相續者是緣問若爾緣自相續所起善心惟長養自相續應是因非緣大德說曰轉是因隨轉是緣近是因遠是緣如近遠在此在彼和合不和合在此身在餘身應知亦爾問若爾同類隨轉應是緣非因無明緣行等應是因非緣故因緣體雖無差別而義有異謂因義親緣義是疎為表此義說因有六說緣有四若不爾者名數應同阿毗達磨大毗婆沙論卷第二十一

說一切有部發

音釋

覆覆敷切蓋也 壓乙甲切鎮也 枱排步皆切楯食 楯尹切與盾同枱 也也 擥尹切與盾同枱 劣劣力切弱也 挽無 也也 豎立也

神一

十八